

兩般秋雨盦隨筆

兩般秋雨盦隨筆目五

在疚記

宗彝

同姓

治中

脫十孃顧二孃

六女

躲破鼓

上舍

桂花新

輓聯

文莊奏語

孫徵君語

誌哀

竹枝

胸襟

廢紙

父子異趣

兄弟異趣

居官不聽子弟言

溫伊初

栢相詩

喜鵲

魔漿

紈袴傳

馬坡巷

私蓄

帝王言動

難博學

蒙古兒

清勤堂隨筆

黃蓉石

狼巾

樂氏棗

嫁娶

惜陰

操北音

無題詩

下體

張南山

公孫

避諱

行路歌

砵

缺文衍文

返魂梅

贈酒資

喪服

詩與景合

銘

不好玩物

縣令念佛

醋瓶畫匣

識字

四忌銘

段拂

欲富貴

桐花閣詞

緩葬

魏野

吹皂莢

紹興

餛飩湯注硯



王澹音

孟子逸句

素淚江山

岳忠武硯

異產

楚姑

怙惡

張胡子

侵宅詩

潮州樂府

湖膠

秦檜鏤

重建始興文廟碑記

家教

古磚

友漁齋詩

漁洋山人詩

同人集姓氏

無題詩

寫榜吏

字無對

周槐

碩人

逸書

宋主荒淫

通

詩品

雷異

高懷

講易

聖相師王

任忠勇神道碑

朱註作小講

安南表

麗人行

酒祀典

人心不死

詩人工對

黨姦之尤

厠詩對

小人

蝦蟆給事

弟婦

余

啜敔

丁拐兒

笑柄有本

代寫書

治眼齒

奚鐵生

些

路化王

物性之異

陽明

問家鄉詩

糖霜

詩書序次

武后

讀書

兩般秋雨盦隨筆卷五

錢唐梁紹壬應來甫纂

在疚記

明忠莊朱公諱之馮字德止號勉齋京師人官中丞殉甲申之難著在疚記中多粹語有云隱惡揚善者聖人也好善惡惡者賢人也分別善惡無當者庸人顛倒善惡以快讒謗者小人也

宗彝

思南石阡一帶山中產獸曰宗彝類獼猴巢于樹老者



直居上子孫以次居下老者不多出子孫居下者出得果卽傳遞至上上者食然後傳遞至下先儒謂先王用以繪於尊者取其孝也

同姓

張獻忠亂蜀焚燬城市祠廟惟梓潼七曲山張亞子廟盛有增飾且追尊帝君爲始祖遇張桓侯廟亦不敢毀唐黃巢之亂屠戮無算然獨厚同姓如黃姓之家及黃岡黃梅等縣皆以黃字得免盜賊之行如出一轍然今人之暴富貴而卽忘其族里者殆盜賊之不若矣

治中

官名治中中字多讀如字非周禮天官凡官府都鄉州及都鄙之制治中受而藏之鄭司農曰中者要也謂職治簿書之要也則中字宜與中傷中酒等字同音

脫十孃顧二孃

王阮亭先生詩云樽前白髮談天寶零落人間脫十孃

注金陵舊院有顧脫諸姓皆元人後沒入教坊者江寧脫十孃者年八十餘尚在萬歷中北里之尤也陳

句山先生詩云誰將幾滴梨花水一灑泉臺顧二孃

注顧

二孃吳門人善製硯住專諸巷

六女

廣州順德縣李氏簡姑定姑介姑潔姑寅姑璇姑遭滇寇之亂誓志同死連臂投淵見漁洋山人池北偶談然廣郡六貞女事不止此康熙丙辰逆周入寇順德有伍某者知陳村生員李朝宗有同堂女六人年及笄皆殊色因勒其家爲富戶派助兵餉使人謂李曰以六女歸伍事必解六女知不免一夕同赴水死六屍浮出面色如生遂合葬于龜山之陰事聞下伍于獄瘐死又增城黃燦陽妻湯氏及其弟一初之女曰慎曰志曰愛及庠

生森然之妹曰可再曰蝦湯孀守與五女共處樓中崇  
禎戊辰賊黃仲積攻樓湯與五女墜樓死邑令方大猷  
有詩紀之順治癸巳李定國攻新會菱塘諸鄉治戰艦  
應之定國敗走藩兵至偵知李良宰富誣其通寇使游  
檄索金卽免李靳不與兵圍其居李有六女登樓自縊  
良宰墜樓被殺乾隆丙申三月賊衆劫新會鄺佳俸家  
樓時有女鄺蘭孃胡鶴孃胡寅孃胡帶孃廖寬孃鄺妹  
孃懼辱墜樓人呼墜樓六貞女云

躲破鼓

同州府志卷之三  
昔有人養二猿牝者甚淫一日失牡叫號不已主人徧  
覓不得翼日乃出自破鼓中故今號人之避內差者曰  
躲破鼓

上舍

明初一上舍任都掌院羣屬忽之約二三新差巡按者  
領教掌院厲聲云出去不可使人怕歸來不可使人笑  
聞者凜然

桂花新

蔣茗生太史空谷香傳奇魯學連移官齣內桂花新一

支云山平水遠出桐江。柔艣聲中過富陽。塔影認錢唐。  
何處是故人門巷。叙自嚴州至省城。光景歷歷如在目。  
前余久羈嶺表。夢繞家山一再誦之悠然神往矣。

輓聯

姨丈蘇子齋先生

繹

初入翰林繼擢御史鶚級捐復員

外補刑部湖廣司轉郎中出爲山西朔平府知府丁母  
艱起復簡山東青州府知府卒於官家大人在粵接訃  
命王爲輓聯云侍直西清珥筆西臺又盡職西曹出治  
懋勳猷兩省春風思太守耗傳東浙心傷東魯奈身羈

東粵招魂長歎息一江秋水哭先生又同年徐秋厓孝

廉廷煥會試場中得病十四日而歿于邸舍余代家叔

小槎比部作挽聯云十四日病莫能興幸喬梓相依屬

續尚能親含玉令嗣訪齋亦因會試在京三千里沒而猶視痛桑榆

垂暮倚閭空自盼泥金太翁來若先生年八十餘猶在堂也

文莊奏語

先文莊公在政府一時援引如陳句山太僕兆崙孫虛

船通議顯皆名宿或有以公庇護同鄉言于

上一日

召公謂曰人言爾庇護同鄉自後有則改之無則加勉

公頓首對曰

臣領

皇上無則加勉之訓時服其有體

孫徵君語

蘇門孫徵君鍾元先生

奇逢

嘗題壁云人生最繫戀者

過去最希冀者未來最悠忽者現在此三語真世人藥石也

誌哀

先君疾終開平官舍時

不孝

甫會試下第旋里驚聞凶



耗匍匐南來含殮未親罪難擢髮鴛湖陸琴臺先生咸

高時在幕中掌書記賦臺城路輓詞二闕云春殘忽爾

維摩擾林禽正呼歸去君時有歸田之意緣逋累未逋果至暮春疾作鄉心更切

重千鈞載無片石相對祇增愁緒刀圭何補恨泰緩來

遲玉樓先赴省醫至已不及矣化鶴飛鳬送君魂返古杭渡甘

棠歌徧嶺嶠看碑題墮淚奚減羊祜甲第箕裘宰官衣

鉢況有傳經小杜謂嗣君晉竹孝廉真無憾處儘撒手紅塵游

神紫府滿目悲涼彌畱無半語君臨終與家人無一訣別之詞知君一

去無依戀淒涼殯宮誰奉下第劉蕡思親仲子可有夜

來凶夢

晉竹時赴試未回

關山阻壅只寡鵠孤鸞據牀啼湧更

是傷心左家嬌女雪衣送萍蹤飄散太促想芙蓉幕捲

情緒千種寄白堂閒

蒼城署廳之額曰寄白堂

拈紅會散六十二旬

歡縱余尤誼重感伯也當年榜花曾共

太翁丈庵先生與先胞伯戊申

同兩世科名

君又與星槎家兄同年

撫棺增一慟情真意摯令人

哀感謹泣而誌之

### 竹枝

嶺南竹枝詞多矣余最愛彭羨門先生一首云妾家谿口小迴塘茅屋簾扉蠟粉牆記取榕陰最深處閑時來

坐喫檳榔風韻獨絕綽有古音

胸襟

陳同甫作忠臣論以武庚爲忠臣孝子之首此言必有爲而發蓋譏高宗之緩于復仇也又高宗定都臨安同甫醉中睨視之曰決錢江之水城可灌也明祖定都金陵姚少師作詩曰蕭梁事業今何在北固青青眼倦看帝王創建虎踞龍蟠自以爲子孫萬世之業而二人者直以草芥視之其胸襟爲何等耶

廢紙

蕭山蔡荆山茂才出示冊頁一本其中所潢裱者乃成  
化時某縣呈狀一紙萬歷時某科題名錄一紙崇禎時  
某家房契一紙隆慶時某年春牛圖一紙宣德時某典  
當票一紙宏治時某姓借券一紙天啟時某地弓口圖  
帳一紙景泰時某歲黃歷太歲方位圖一紙數百年廢  
物以類聚之亦入賞鑑可謂極文人之好事矣

### 父子異趣

曹操殺孔北海禁其文其子丕獨愛之令天下有上融  
文章者輒賞以金帛蔡京立黨碑禁蘇黃文字子條論

議專以蘇軾黃庭堅爲本宣和五年或言于上奉旨落  
職趙明誠趙正夫挺之子也正夫惡黨人明誠撰金石  
錄每遇蘇黃片紙隻字必收藏以此失愛于正夫權姦  
之勢可以傾朝野而不能得之于家庭亦異矣哉

### 兄弟異趣

曹丕篡漢陳思王植變服而哭司馬炎篡魏習陽亭侯  
順歎曰事乖唐虞而假爲禪名遂悲泣廢黜而卒王荆  
公行新法弟平甫頗不直之一日荆公見呂惠卿平甫  
于內吹笛公使人謂曰請學士放鄭聲平甫使人答曰

請相公遠佞人宋郊爲相儉約自奉弟祁爲學士游讌  
奢豪以十重錦幃覆屋爲長夜之飲郊使人謂曰寄語  
學士記當日讀書某山夜半啜冷粥時否祁荅之曰傳  
語相公試問當日夜半啜冷粥是爲甚的同氣之不同  
志趣如此

居官不聽子弟言

明耿定向先進遺風云楊文定公溥執政時其子自鄉  
來省公問曰一路守令孰賢對曰兒道出江陵其令  
殊不賢公曰云何曰卽待兒苟簡甚矣乃天台范理也

文定默識之卽薦陞德安府知府甚有惠政夫居位者方以趨奉之勤情疎密張我威福其子弟卽藉父兄之勢以嚇當路而父兄卽聽子弟之言以寄耳目文定不私其子反以此重其人所以勵官方者在此所以垂家法者亦在此嗚呼賢矣

溫伊初

溫伊初訓粵東嘉應州長樂縣人也道光乙酉選拔貢生壬辰舉于其鄉是科先君分校秋闈其房師某公以此卷示先君先君曰此必長樂溫某也揭曉果然故伊

初于先君有知己之感。執弟子之禮甚恭。著有登雲山房文藁。純學昌黎。又梧溪書屋詩四卷。不屑屑作宋元以後語。有七古一篇。純用盲左語。頗奇恣。其題云余贈鐵孫雪庵詩。有武庫森然排甲艾句。今鐵孫贈余詩。純以兵喻。復效其體。奉酬詩云。徐君治詩如治兵。窮兵日。日尋戰爭。兵連禍結無時已。坐令兩國荒春耕。余與鐵孫皆以耕。翩然大師復加我。畏君之威。請行成。室如懸磬。野無草。一任強敵來縱橫。焚舟濟河。秦師銳。閉關塞。竇晉國。驚悉索。敝賦雖已罄。有死不甘城下盟。華元登牀見子。



反析骸易子抒其情。請君退師三十里。哀憐敝邑許之。

平溯惟首禍始何人。實我小國敢自矜。

余先以詩贈鐵孫

息侯

伐鄭不量力。宋公廁伯徒虛名。漫云匹夫不可狃。豈知大國寧敢輕。室皇蒲胥車劒及組。甲被練千百并。左廣右廣次第駕。上軍下軍迺遲行。莒嫠紡績城可度。堇父懸布堞再登。井湮木刊陳何酷。斬祀殺厲吳正勅。華泉取飲兩驂絰。炊鼻下車一足蹙。背城一戰吾倘能。休兵三駕君已羸。果然牛瘠豚能僨。始信雞鬪雄先鳴。嗟我與君匹楚晉。城濮報邾勝敗更。欲效向戌弭兵法。玉帛

相見交于庭止戈爲武繹古義散厥馬牧之郊垞却憶  
南山射虎將來詩言訪雪庵力能飲石誰抗衡請君更張十萬  
弩我從壁上瞪雙睛月過上弦利行師試執同律聽軍  
聲

栢相詩

栢鞠谿節相總制兩江與河督陳公鳳翔意見不合遂  
相傾軋陳公奉

旨革職并荷校河干旋以憤卒一時不免物議沸騰栢  
公作感懷詩四首云淮甸雲沈月上遲夜寒獨坐夢醒

時霜欺短鬢。愁低首。花放長檠。笑展睂。碁局定能消黑。  
白。蛙聲那復問公私。路人萬口驚相告。鼠穴牛車事亦  
奇。狂花滿眼。闌沈醺。說鬼談禪。異所聞。鏡裏無形難覓。  
影。峰頭有石易生雲。服轅老馬愁前路。鍛羽秋鴻感舊。  
羣。箕斗插簷天尺五。自扶筇杖看星文。膠漆雷陳託舊  
盟。相逢一笑。素心傾。平生自詡。汪汪度。宇宙曾垂矯矯。  
名。海市幻成樓有象。并刀翦處水無聲。著書辨謗渾多。  
事。付與千秋月。且評。嬾從龜策問行藏。尺短何能較寸。  
長。只恐身名終碌碌。空令歲月去堂堂。忘家久作離塵。

想多病難尋辟穀方。昨夢游仙心境朗。五雲樓閣氣蒼茫。事雖不純而詩則名貴可誦

### 喜鵲

明東阿于慎行穀山筆塵云竇參爲相其族子名申者爲給事中招權受賂參每遷朝士常與申議申因先報其人時以喜鵲目之及參賜死申亦杖殺喜鵲亦自不吉如此今之卿相子弟爲喜鵲者可以戒矣此語甚新

### 魔漿

梁武帝斷酒肉文云酒是魔漿可與福水二字的對蓋

一頌一戒也。又諺謂酒曰其益如毫其損如刀。旨哉斯言。

紈袴傳

三原孫枝蔚。豹人。少年行云。少年不讀書。父兄佩金印。子弟乘高車。少年不學稼。朝出烏衣巷。暮飲青樓下。豈知樹上花。委地不如蓬。與麻可憐樓中梯。枯爛誰論高與低。爾父爾兄歸黃土。爾今獨自當門戶。爾亦不辨畝東西。爾亦不能學商賈。時衰運去繁華歇。年年大水傷禾黍。舊時諸青衣。散去知何所。簿吏忽升堂。催租聲最

怒相傳新使君。憐才頗重文。爾曾不識字。張口無所云。  
賣田田不售。哭上城東墳。昔日少年今如此。地下貴人  
聞不聞。雲間孫鉉批曰。此詩可爲紉袴子作傳。

### 馬坡巷

馬坡巷近東花園爲上馬坡。北抵清泰門爲下馬坡。舊  
名馬婆巷。元奉化戴帥初。戊戌清明杭邸坐雪。絕句云。  
思鄉處處只愁生。正好春游又不晴。雪似梨花雲似柳。  
馬婆巷口過清明。蓋巷猶南宋時名也。見厲樊榭東城  
雜記。

南齊書卷之三  
三  
私蓄

明程至善無顏錄云父母富其子私蓄不可無無者非  
敗子卽驕人也父母貧其子私蓄不可有有者非逆子  
卽忍人也先大父丈庵公云親富而有私蓄必能儉約  
自處省縮贏餘若假親名以謀非分之財據爲私蓄或  
至貽父母惡名則其罪亦與逆子忍人等矣

帝王言動

宋藝祖夜半思食羊肝左右曰何不言帝曰若言之則  
大官必日殺一羊矣宋仁宗游幸上苑偶患渴屢顧銚

子不得遂隱忍入官渴甚索飲左右問何不言帝曰言之則必有得罪者矣明武宗在宮中偶見黃蔥實氣促之作聲爲戲宦者遂以車載進御蔥價陡貴數月明穆宗偶思食果餽餅來日御膳房起麵者剝果者製糖者開支至五千金帝笑曰只須銀五錢便可在東華門口買一大盒矣蓋帝在潛邸早稔其價也朝廷之一言一動其不可忽如此

難博學

杭葦浦太史

世駿

記問淵博鄉人難以俗字竟無以對



傳爲話柄考江行雜錄載鳴條山有餘慶寺司馬溫公  
一日省墓至寺中父老五六輩請曰某等聞端明在縣  
日與諸生講村人不及聽今幸爲畧說公卽取孝經庶  
人章講之旣已復前曰自天子章以下各有毛詩二句  
此獨無何也公默然謝曰生平慮不及此當思所以奉  
荅父老出語人曰吾今日難倒司馬端明矣王漁洋云  
聞耿道見說古本庶人章末有詩二句云晝爾于茅宵  
爾索綯又孫退谷古本孝經與今本迥別附記

蒙古兒

市井以爲銀之隱語按

國書蒙古原作銀解蓋彼時與金國號爲對耳一文錢傳奇羅夢齋云蒙古兒覷着他幾多輕重謂元寶也

清勤堂隨筆

先文莊公在朝日蒙

賜御書清勤堂額敬懸里宅昭示子孫夫處家以清則凡屋舍之樸服御之儉飲食之菲燕會之薄以至錐刀之利不爭便宜之事不占皆清也處家以勤則凡朝夕之省祭饗之節教誨之嚴誦讀之密以及交接之禮必

周奔走之事必任皆勤也居位之軌範在此治家之楷模亦在此昔

高廟作懷舊詩其先臣一首云奉職恪且勤居家儉而省真知臣莫若

君矣公有隨筆五則敬錄于左大司農趙恭毅云世著清操衣冠儉素下體不著寸絲尺紬之飾江南賢達往往效之于俗有益○陶石簣云世族只爲體面二字凡應酬日用必須華贍因之日事典賣使祖業蕩然逢人乞貸使親友畏避居官則竊帑藏賸閭閻居鄉則事居

閉忒漁獵身心勞瘁而弗辭名行墮裂而不惜已之體  
面終不能顧豈非大錯○從來蓄珍異之物未有不招  
尤賈禍者卽藏名人字畫以傳子孫亦非貽謀之道門  
祚少衰往往世家求索雖與佳者輒疑非是受累不一  
而足可勿鑒哉○粉墨登場所費不貲致滋喧雜之煩  
殊乏恬適之趣且招盜誨淫爲患不止一端士大夫所  
當永戒也○朱文端相國自奉甚約撫浙時飭所部凡  
婚嫁喪葬貧富各有品式務崇樸實勿事華靡宴會則  
簋極於五而止時翕然從之汪西昆云吾邑素風古樸

自陸比部多冠蓋交豪華相炫遂靡然一變今冢宰王公率先復古往時宴客必盛饌今以公教雖三肴客不怪也往昏娶樓船簫鼓競以夸勝自公不舉樂不張紅遂相率而改其舊習公見人厚款則覲然起見人炫服則愀然憂每與人言節儉一端不但可以裕財惜福寡欲清心且免妄求橫取人品賢否每係乎此諄諄往復紳士多承其教焉

黃蓉石

番禺黃蓉石孝廉

玉階

弱冠卽有聲庠序四方名士多

與之游道光壬辰舉于鄉先君分校所得士也貌溫雅  
工詩古文詞所著蓉石詩鈔僅窺四卷非全豹也錄其  
讀鄜湛若赤雅有懷三十三首之六云莫將遺俗笑狂  
奴妙舞天魔興不孤懷遠已人空有淚日南埜女本無  
夫山坳冷笑啼鉤鵲水面含沙怯短狐麴代髑髏椰釀  
酒尚畱時節祀盤弧憐他攻掠苦難休鼓角頻看埜戰  
稠木客好吟新樂府扶南原是古諸侯奇兵出沒相思  
寨明月笙歌獨腳樓便上奇雲亭上望離人多少軫鄉  
愁驚心齊指亂峯間十去征夫九不還黑日暗霾人鮓

夔陰風寒徹鬼門關。髑髏一夜游魂泣。石乳千秋怨血  
斑。指點蒼鷗啼碎後。蠻烟蛇霧有無閒。李白巖邊急亂  
流。昔時騷客此勾留。風前單舸蘅蕪怨。天末夫君翡翠  
愁。坡老舊維滕縣舫。謫仙曾作夜郎游。如今香草悲遲  
暮。淒斷哀猿咽上頭。絕頂河山舊有緣。閒雲鳥跡盪無  
邊。蘅皋荔浦騷人賦。蓮蕩松杉小有天。香冢土花沈玉  
笛。蠻溪陰雨暗銅船。時豐共唱昇平樂。競渡饒歌會五  
年。流落人閒不易才。甘心蛇口事堪哀。無家張儉褰裳  
去。有恨靈均繭足來。百粵已從鳴鋏老。諸蠻畱取著書

才天南法物飄零盡。不見當年綠綺臺。沈雄頓挫綺麗  
芊綿。洵南中之秀也。

狼巾

山舟學士舊藏蟲窠一枚云太翁葭林編修公以圍碁  
決賭得之嚴氏者。嚴自何處來未曉也。其色棗赤狀之  
犬小長短亦絕似不鏤自雕如細目之網緣督爲經又  
若小口之囊一面附著樹枝處痕深陷而直貫徹上下  
以是知爲蟲所結也。少宗伯金海住先生姓曾有詩詠  
之。學士和詩云此蟲真合號雕蟲。蠹化猶驚織作工。韞



雀結房嫌緻密。簿蠶成繭欠玲瓏。誰紉越客千絲網。疑  
墮仙樵一翦風。六十餘年遺蛻在。那堪重問主人翁。學  
士歿後是物爲張岐山少尉。問萊乞去攜入川中矣。許  
周生駕部。宗彥云是物名狼巾。不知何據。

### 樂氏棗

羣芳譜山東新城有樂氏棗。豐肌細核多膏肥。美舊傳  
樂毅自燕攜來之種。亦曰毅氏棗。見太平寰宇記。以對  
哀家梨甚工也。

### 嫁娶

胡安定公云娶婦當不如吾家嫁女當勝于吾家程子云世人多謹于擇壻而忽于擇婦其實壻易見而婦難知所關甚重豈可忽哉袁氏世範云有男雖欲擇婦有女雖欲擇壻又須自量我家子女我子庸癡愚下若娶美婦豈但不和或有他事我女醜拙狠妒若嫁佳壻萬一不和卒爲所棄凡夫婦因非偶而不和者皆父母不審之罪也此可爲嫁娶之法

### 惜陰

黃山谷與駒父尺牘云尺璧之陰當以三分之一治家

以其一讀書以其一爲碁酒公私皆辦矣此猶自暇逸之論明蓮池師竹窗二筆云古謂大禹聖人惜寸陰至于衆人當惜分陰而佛言人命在于呼吸夫分陰之中有多少呼吸則我輩何止當惜分陰一剎那一彈指之陰皆當惜也又伊庵權禪師每日至晚必流涕曰今日又只恁地空過未知來日工夫何如勵精若此閱之竦然

操北音

鍾儀曰樂操土風不忘舊也吳越王作鄉里之音而長

老盡歡亦是此意。今南人喜操北音。世族之子弟尤甚。隨園老人卮言一首云。衛侯效夷言。取笑自彌年。南人操北音。之推代含羞。緣何窶人子。譚語偏呶呶。好學埴澤呼。不待楚人咻。滿口雜夷夏。唇齒皆王侯。未登勛項橋。先爲反舌鳩。終竟神不王。改字難改喉。大言雖炎炎。聞者搖其頭。侯音玄女笑。蠻語參軍愁。何不操土風。高師一楚囚。讀此詩亦當失笑而結舌矣。按抱樸子譏惑篇云。有轉易其聲以效北語。旣不能似。可恥可笑。所謂不得邯鄲之步。而有匍匐之嗤者。則此陋習由來已久。

無題詩

有人以無題詩上下平韻三十首示余閱之對仗工整  
設色綺麗而七寶樓臺拆無片段遂朗誦一過卽行繳  
還又有人以真孃墓一首示余其詞云兒家生小住金  
閨卻把金閨作故鄉馬足殘花憐薄命牛毛細雨送斜  
陽碧苔多處生紅豆青冢傍邊種白楊一寸鞦尖一寸  
草禁烟時節土猶香雜誦迴環擊節靡已一友見而謂  
余曰二君詩子何軒輊之甚余荅曰此梅禹金舊例也  
宣城邱華林嘗賦梅花詩百首示禹金禹金但爲句讀

而已一日閩人林初文以一絕句示梅云不待東風不待潮渡江十里九停橈不知今夜秦淮水流到揚州第幾橋梅擊節歎賞逐字圈贊邱見之慍曰林詩二十八字正得二十八圈吾詩二千八百字至少豈不值得二十八圈乎聞者傳以爲笑

### 下體

男子下體曰陽具曰人道夫人知之也亦曰馬藏見三昧經亦曰燭營見淮南子精神訓亦曰餘竅見列子仲尼篇亦曰穢穴見列子仲尼篇注亦曰勢峰見瑜珈師

地論亦曰睪丸見素問經

張南山

張南山

維屏

番禺人道光壬午進士湖南知縣現官司

馬工古文惲子居稱其文爲嶺南柳仲塗尤畱心於

國朝人物所撰詩人徵畧一書於尚論中寓闡幽意又

有聽松廬詩草十一卷其詠史樂府另爲一卷直登西

涯之堂而入鐵厓之室其他五言如落葉云有時兼雨

點無處著烟痕松滋城外云江抱孤城曲天圍大野圓

浮湘云霧因衡嶽重月到洞庭多漢陽晚眺云西風吹

漢水秋色滿江城。思歸云。霜濃楓葉醉。水活荻苗肥。七  
言如獨坐。云縱無清露。蟬終潔。果有名花。蜨易癡。感秋  
云。名心淡似秋雲影。客夢清於古井波。北程紀游云。如  
何東下錢唐水。不入南條禹貢篇。下第遣懷云。戀岫雲  
容多黯澹。送春天氣易悲涼。楚中懷古云。臣里夢魂春  
樹外。君山眉黛夕陽中。西栽曉行云。一村曉霧白成海。  
萬頃春苗綠到天。閒居雜詩云。但畱玉在何愁璞。莫待  
桐焦始辨琴。柳色云。霧影迷離天。遠近。烟痕狼藉水。西  
東。城南野望云。繞籬水暖蘆根活。穿樹風柔麥氣和。百



花墳云鶯花黃土埋香骨盤敦青樓享盛名。

公孫

震澤任中甫

兆麟

讀經雜說云幽風公孫碩膚孫當作

如字公爲季歷孫周南文王子亦稱公族公姓也其說不知何本

避諱

福大將軍威震中外屬吏有犯其祖父諱及本身名者必當面申飭故其時稟啓改康爲泰改安爲寧按寇萊公作相諸司公移諱其名改爲淮又汴京舊有平準務

因蔡京父名改爲平貨務官私公移避京名如京東京  
西改畿左畿右則此風由來久矣

行路歌

別人騎馬我騎驢仔細思量我不如回頭只一看又有  
挑腳漢言雖俚淺足以醒世

砵

杜工部有贈表姪王砵詩砵音厲說文引論語曰深則  
砵謂履石而渡也

缺文衍文

論語堯曰篇曰予小子履上當有湯字孟子第五篇下  
伊尹曰曰字衍

返魂梅

眞州城東十餘里準提庵有古梅一株大可蔽牛五幹  
並出相傳爲宋時物康熙中樹忽死垂四十年復活枝  
幹益繁花時光照一院阮芸臺協揆題其名曰返魂梅

贈酒資

沈菰町先生名景良字敬履北郭高士也與陳丈二西  
燦  
奚丈鐵生岡交最密所居土垣圍荒畦數棧藝花蒔

菊瓦屋二椽蕭然四壁嘗雨中著書以緼縛椅後坐其  
下蓋避屋漏也工詩老年詩本爲人竊去歿後其人攘  
爲已作刊之有知之者譁于衆其人遂并板燬之故其  
詩不傳鮑淥飲詠物詩存刻其夕陽二律先生好飲窘  
于杖頭黃小松司馬自濟寧歸贈以酒資賦卽事詩一  
絕云故人歸訪故山棲怪我葫蘆久不提笑贈青蚨三  
百片晚來依舊醉如泥其風趣如此何春渚先生琪曾  
爲之作傳

喪服

大祥後爲禫服或曰三月或曰一月又喪服計閏不計閏向未知確義震澤任中甫爲之說云士虞禮中月而禫鄭康成據中一以上釋之謂中間一月王肅據文王受命惟中身釋之愚謂中月當如學記中年義雜記期之喪十五月而禫汪荅文曰主二十七月者據閒傳中月而禫之文也主二十五月者據三年問二十五月而畢之文也主三十六月者據喪服四制三年而祥之文也惟鄭氏得其中故歷代因之且三年問喪服四制二篇朱子所定儀禮刪之不可爲典要朱子荅胡伯量曰

中月而禪鄭注虞禮爲是穀梁傳謂喪不數閏公羊傳  
謂喪數閏鄭志謂喪以月數者計閏以年數者不計閏  
是三年與期不計閏大功以下計閏也何休云閏爲死  
月數非死月不數蓋閏附前月死之月不可移而下是  
父母死于閏月未嘗不數若閏當除喪之月則亦不數  
此又不可不知也

詩與景合

余嘗暮游湖上水色山光深淺一碧紅霞如火岸桃俱  
作白色欲寫之苦無好句偶讀孫子瀟太史詩云水含

山色難爲翠。花近霞光不敢紅。適與景合。眞詩中畫也。  
又嘗夜登吳山。風月清皎。烟霧空濛。頗愜游騁。今讀屠  
修伯大使秉吳山夜眺句云。江湖兩面共明月。樓閣半  
空橫。斷烟亦恍如置身其間。

銘

銘之爲體。於詩詞外。另具筆墨。冬心先生以古勝板橋  
居士以峭勝頻羅老人。以趣勝各臻其妙。余未窺涯涘。  
閒亦效顰。茲蒼其記憶者。備錄之。自用硯銘石友石友與爾  
南北走伴。我詩伴我。酒畫蚓塗。鴉不我醜。告汝黑面知。

共我白頭守

胡蘆座銘

豐下銳上兩輪相盪是之謂依樣

方鏡

銘

輝光剛健圭稜四見照來誰有如田面

獨眼硯銘

有文字

緣有文字禍爾具隻眼可能覷破

象牙算盤銘

劈二五耦分

上下牀焚身而猶近于賄是真沒齒不忘

竹臂欄銘

有未乾

之墨無停綴之文倚左右手惟此君吾將爲爾策汗簡

之勲

基奩銘

知其白守其黑便便于腹了了胸旁觀不若

爾能嘿

枕銘

甜鄉醉鄉溫柔鄉三者之夢孰短長仙人與

我炊黃粱

鴉片烟槍銘爲雷君少石浼作

可以助茗戰可以卻酒兵可

以破睡壁可以攻愁城故殺敵致果而以槍爲名

又爲陸琴



臺作蒼筤尺八勻而堅可吸瑤草呼秋烟誰其主者餐霞

仙雁足距非雞掌非鳬獨立一足秋風孤假之光明玉

雪鋪不以爲傳書之使而命爲守更之奴筆飲拜管城

封錫湯沐邑給以短假得休息若夫潤澤之無有枯渴

筆筆牀貪墨者敗藏鋒者待中書之君甚矣憊偃之息

之將汝賴茶船酒有舟飲防溺也茶有舟水防厄也君

子于此有戒心焉匪徒以懼執熱也陽羨砂上如斗下

如卣鼈其足螭其首可以酌玉川之茶可以斟金谷之

酒眼鏡讀萬卷書行萬里路有耀自他我得其助錫暖

銘爲沈先錫以湯泉後錫以酒泉惟醉翁中和其天印

色盒居圖書府成印信功寵以白沙之策錫以紫泥之

封額銘梅花帳學林和靖以梅爲妻學趙師雄以梅爲姬梅

兮梅兮吾亦與爾同夢兮又有友人買一竹絲鏡奩製  
作精雅乞余爲銘余曰不若直書漁洋山人句浦裏青  
荷中婦鏡江干黃竹女兒箱爲天然讚語也

### 不好玩物

呂蒙正爲相有以古鑑獻者云能照二百里公曰吾面  
不過楮子大安用照二百里爲又有以古硯求售者云

一呵卽潤無煩注水也公曰就使一日能呵一擔水亦止直十文錢而已此與東坡駁古墨同一諧謔玩物之戒直令賣骨董者神喪氣沮

縣令念佛

樓攻媿集七十九卷前輩有爲縣令者公退以貫珠誦佛其叔父見之云汝欲爲佛耶曰然叔曰汝旣做了知縣尚想做佛耶言造業之多也其人悚然余謂此猶有悔過之意若今之縣令并不肯手捻貫珠閒中懺悔矣

醋瓶畫匣

程子曰貴姓子弟于飲食玩好之物直是一生將身服事不懈如管城之陳醋瓶洛中之史畫匣是也噫今之世家子弟其不爲醋瓶畫匣鮮矣然擣蒲六博之好倡樓妓館之游往往破家蕩產又豈止瓶匣而已哉

### 識字

讀書必須識字今人口習授受漫不經心說文玉篇等書束之高閣矣朱子云讀書須精韻學要熟反切莫從俗讀半邊字不辨形聲嗚呼讀半邊字之訣千百年不失其傳而字學之不講也久矣皇甫湜與李生第二書

曰書字未識偏旁高譚稷契讀書未知句度下視服鄭此時之大病所當嫉者又李濟翁師資錄云諺曰學識何如觀點書點書之難不惟句度義理兼須知字之正音借音斯言是矣

### 四忌銘

江邦申耳目日書四忌銘云著書忌早處事忌擾立朝忌巧居室忌好旨哉斯言

### 段拂

段拂字去塵米元章之壻也元章有潔癖見其名字喜

曰旣拂矣又去塵眞吾壻也以子妻之拂南渡後仕至參知政事相攸之法甚奇

### 欲富貴

明釋祿宏直道錄云宣聖儒之宗主所當朝夕禮拜而供養者乃舍之而事文昌六經論孟所當朝夕信受而奉持者乃舍之誦準提咒事文昌持準提非不善也而其心則在富貴夫富貴在天聖有謨訓文昌準提何與哉又梁次公云欲富者貧相也欲貴者賤相也急欲富貴者天相也見樗齋漫錄此言最砭人

桐花閣詞

嶺南多詩人而詞家絕少嘉應吳石華廣文

蘭修

著桐

花閣詞郭頻伽先生以爲跌宕而婉綺麗而不縉有少  
游之神韻而運以梅溪竹山之清真者也黃金縷云柳  
絲細膩烟如織病過花朝又是逢寒食多少春懷拋不  
得都來壓損眉峰窄可憐生抱傷心癖一味多愁只恐  
非長策葬罷落花無氣力小闌干外斜陽碧減蘭過秦  
淮云春衫乍換幾日江頭風力軟眉月三分又聽簫聲  
過白門紅樓十里柳絮濛濛飛不起莫問南朝燕子桃

花舊板橋余酷愛誦之

緩葬

杭人緩葬之弊昔人以爲起于南宋謂欲返骨汴梁故設爲權厝之計而實不盡然緩葬者惑于風水之說也司馬溫公著葬論剴切詳明因節錄之論曰葬者藏也孝子不忍親之暴露故斂而藏之齎送不必厚厚者有損無益古人論之詳矣今人葬不厚于古而拘于陰陽禁忌則甚焉古人卜宅卜日蓋謀人事之便耳今之葬書相山川岡畎之形勢考歲月日時之干支以爲子孫



貴賤貧富壽夭賢愚皆係于此非此地此時不可葬也  
舉世信之久而不葬問之曰歲月未利也曰未有吉地  
也曰游宦未歸也曰貧無以辦具也夫人所貴于身後  
有子孫者爲能藏其形骸也其所爲乃如是曷若無子  
孫者死于道路猶有仁者見而殮之耶古葬期遠不過  
七月今令王公以下三月而葬禮未葬不變服食粥居  
廬哀親之無所歸也今人背違禮法未葬除服從宦四  
方食稻衣錦于心安乎人之貴賤貧富壽夭係于天賢  
愚係于人於葬何預就使皆如葬師之言人子當哀窮

之際何忍暴露其親自營福利耶昔吾諸祖之葬也家貧不能具棺槨自太尉公下始有之然金銀珠玉之物未嘗錙銖入壙將葬太尉公族人皆曰葬不詢陰陽此必不可吾兄伯康無如之何乃曰安得良葬師而詢之僉曰近村張生良師也兄乃招張生許以錢二萬曰汝能用吾言吾畀爾不則將求他師張曰唯命是聽于是兄以已意處歲月日時及壙之淺深廣狹皆取便于事者使張以葬書緣飾之曰大吉以示族人族人無違議者今吾兄年七十九以列卿致仕吾年六十六忝備侍

從宗族之從仕者二十三人視他人之謹用葬書未必勝吾家也前年吾妻死棺成而殮裝辦而行壙成而葬未嘗一言及陰陽迄今無他故余嘗疾陰陽家立邪說以惑衆爲世患爲諫官時乞奏禁天下葬書當時執政莫以爲意今著茲論云云又儀封張孝先先生親喪不可久停說云古者三月而葬謂死者入土爲安非爲子孫之福蔭也近世惑風水之說有停至數年數十年者水火盜賊皆足爲慮而彼漠然弗恤也夫求忠臣必于孝子之門未有不孝而能忠者今宜酌爲定例童生生

員親喪未葬者不准應試舉人進士親喪未葬者不准入官凡考試銓選俱令地方官具印結鄰里具甘結方爲合例庶停喪之風可少息矣余嘗作緩葬說云杭人之死其親以下風水者居多而杭人之世其家以長富貴者絕少人亦可憬然悟其所自而幡然改其所爲乃方且羣有詞曰某家乏嗣某墓之失穴也某氏式微某墳之失向也于是待地之謀日益堅緩葬之心日益固地師淫瞽煽惑之術日益多而不知百族之子孫方奢望于世間羣姓之祖宗久環泣於地下也悲夫或曰擇

地之說富家有之編氓簞戶何亦浮攢淺厝之累累也  
曰是亦富家害之也富家挾重資以求善地而地蛇山  
蠹百出其術以相欺遂使尺土寸田槁壤珍如拱璧彼  
貧戶者其有買山之資耶且習見夫士大夫之矜式鄉  
里者猶山積其祖若父弟若兄之柩比比而不葬也以  
爲吾儕之詘于力而格于勢者固無責焉耳也然則富  
家者自處於忍人逆子之數而絕人以仁人孝子之路  
者也鄉之善人有集腋以營義冢者彼富家且色喜而  
捐資焉是亦知死者之以入土爲安也而獨于其父母

則異之彼豈不曰吾將有待耶人生百年壽無金石汝待時時不待汝汝子汝孫幸而賢幹汝蠱不幸而不賢行敗汝家向之權厝于低垣淺屋中者假而暴露榛莽矣假而蹂躪狐兔矣假而受劫水火刀兵矣人但知慎重之謀長而不知遷延之禍烈也吁可畏哉究之其故何也曰緩葬之弊起由族葬之禮廢族葬之禮廢由睦族之誼亡也曷言族葬廢而緩葬興也古者葬不擇地周禮墓大夫掌邦墓地域爲之圖令民族葬昭穆爲左右晉有九京漢有北邙凡國家墓皆萃焉後世擇地之

術起于是人卜一邱邱卜一穴穴卜一兩棺雖有高陵平原延袤數畝而爲彼術所棄者僅立之石樹之木以觀美焉耳地愈佔則愈盡人愈亡則愈多無怪售地之價日益昂求地之事日益難也曷言睦族亡而族葬廢也假如父母旣歿兄弟數人或獨斷以主謀或和衷以共事準古制踰月三月之條循聖人稱家有無之訓奉而耐之祖塋至不難也乃今昆季之雍睦者寡矣其親旣死相視不謀窀穸者無論有矯矯者出不徇羣議獨任鉅艱亦云善矣然而旣葬之後或數年或數十年舉

家平平無恙尚翕然無異詞若夫科第之盛衰判焉家  
業之苑枯分焉壽數之修短異焉則舉而歸咎當年營  
墓之人曰職是故也其更不肖者至竊疑其弟若兄之  
自謀福蔭而移禍他人也者嗚呼此等逆億之心施之  
行道且不忍而忍施之手足耶是真可爲痛哭可爲流  
涕者矣然則堪輿不足憑乎非也白鶴之示靈也青鳥  
之集異也烏在其不足憑也顧不觀從來之得善地者  
乎有得之神靈者焉有得之夢寐者焉有得之不得已  
而遷葬者焉究之陰德耳鳴所以致地之由者在此不



在彼也然則若何曰生養死葬人子事也卜其兆無石無水焉足矣啓其穴無風無蟻焉足矣營其壙以堅以固焉足矣度其地容拜容奠焉足矣循分以盡禮畱餘以予人竭力以安親修德以俟命夫人苟夙夜捫心俯仰無媿果足以載福致祥而祖父之魂魄既安有不陰祐其雲初者吾不信也無希冀之妄念無侵奪之陰謀而溟漠之中有不隱報夫忠厚者吾更不信也彼谿刻其心僥薄其行龍斷其才力心思而欲以朽骨卜佳城爲後來者富貴壽考之左券而造物乃如其意以予之

者吾尤不信也

魏野

宋山人魏野隱居陝州寇萊公訪之謝以詩云晝睡方  
濃向竹齋柴門日午尚慵開驚回一覺游仙夢村裏傳  
呼宰相來逸則逸矣而未高也故其侍寇公游陝郊寺  
詩云願得常加紅袖拂也應勝似碧紗籠則其處烟霞  
而不忘軒冕可知申和孟涵光隱居廣羊山中有達官  
自京師寄書申報以詩云日日秋陰命筍輿故人天上  
落雙魚荷花未老新醪熟爲道無閒作報書簡傲似更

出魏上

吹皂莢

閨中女兒以筆管吸皂莢水吹五色泡爲戲此事未有

人詠者葉雨軒先生

以信

賦釵頭鳳一闋云春歸悶眠

難穩閒來吹箇團團暈。虛空界。圓光藹。窗邊纔過又飛  
簾外。快快快。朱唇吮。香泉潤。笑拈湘管。郎肩噴。風前擺。  
兒曹待明珠無數。霎時何在。再再再。雨軒先生先君同  
年友也。著有洗心書屋詩餘。醉春風無題云。偷眼窺人  
俊。私語從他問。點頭絕不一沈吟。肯肯肯。明月懷中明。

珠掌上十分圓穩。來去何憑準。好夢難重省。收燈挨過  
又清明。等。等。燕子誰家。柳花無定。一天春恨。一翦梅  
盧溝道中。云城角拖雲淡。不收天。做新秋。人做新愁。一  
官了我十年游。來也盧溝去也盧溝。晚店琵琶撥不休。  
曲似涼州。淚似江州。長空瑟瑟思悠悠。月挂眉頭。人挂  
心頭。

### 紹興

紹興酒各省通行。吾鄉之呼之者。直曰紹興。而不繫酒  
字。以人而比。則昌黎少陵。以物而比。則喻麋朱提。俱以

地名可謂大矣

餛飩湯注硯

清異錄金陵士大夫家餅可暎字餛飩湯可注硯餅固宜以薄爲主若湯可注硯則其乏味可知今京師致美齋清湯餛飩是其遺製

王澹音

婁縣楊子挾室人王澹音

韞徽

紫宇觀察之女也著環

青閣詩稿古風極佳不能備錄近體如荊州道中懷古云千古詞章開屈宋三分事業創孫劉秋風云萼鄉歸

興翰張翰茅屋悲歌感杜陵秋葉云寒蟬抱處棲難穩  
老蠹書成字半欹病中述懷云愁如碧草逢春長身似  
黃楊厄閏頻頗見風骨

孟子逸句

揚子載孟子云夫有意而不至者有之矣未有無意而  
至者矣王仲任曰孟子性善篇云人性皆善及其不善  
物亂之也又人之所知不如人之所不知信矣見梁武  
帝答臣下神滅論君王無好智君王無好勇勇智之過  
生平患禍所遵正當仁義爲本見蕭子良與孔中丞書

按漢書藝文志曰孟子十一篇又應仲遠曰孟子絕糧于鄒薛作中外書十一篇今所存止七篇或有散佚亦未可知然語氣多不類

素淚江山

乾隆己卯春江西豐谿浯村山水暴漲隄決獲石碑泥滓模糊濯薛花讀之有素淚江山四字筆力遒古似率更無題署先是村多練姓明副都御史子寧裔也按明紀子寧江西新淦人淦距豐不越境或緣瓜蔓鈔避難而徙于斯未可知也此碑必其遺蹟或云祠額或云墓

碣莫可考究詳見豐谿徐白舫編修謙悟雪樓詩初集

先生詩多五言律春晚舟望云斜帘花外市遠火雨中樓夜待霞塘渡云路古石稜瘦月高人影微過友山居云雲親常入闥鶴傲不迎人夜雨云暗泉趨沼合斜雨逼燈昏地僻云雨微蕉獨覺風遠竹先聲快心云深葦合溪色遠風遲雁聲晚步郭外云未月水先白無風松自寒秋旅云蟬去有餘響松高無靜柯山中夜寂云風聲移水近月勢趁雲飛舟行暴風云風驕驅峽走龍怒挾江飛入仙巖寺云花對佛微笑雲隨人入來



岳忠武硯

硯色紫體方而長背鐫持堅守白不磷不淄八字無款  
又鐫曰枋得家藏岳忠武墨蹟與銘字相若此蓋忠武  
故物也枋得記又曰岳忠武端州石硯向爲君直同年  
所藏咸淳九年十二月十有三日寄贈天祥銘之曰硯  
雖非鐵磨難穿心雖非石如其堅守之弗失道自全八  
字行書謝眞書文草書皆適古嗚呼三公者後先死南  
宋毅然克踐所言矣復有小方印曰宋氏珍藏朱竹垞  
題識曰康熙壬子二月四日朱彝尊觀於西陂主人齋

中西陂者宋牧仲舉居也另一行云雍正八年夏六月

十有九日良常王澍拜觀道光元年東陽令陳海樓履

和于都門市上得之

### 異產

產之異者禽獸妖怪夜叉肉毬肉帶種種不一大抵皆  
由邪氣所感最奇者續太平廣記載萬歷丁未吳縣石  
湖民陳妻許氏懷妊過期不產一日請治平僧誦經祈  
佑其夕腹痛急忽產下一胞剖而視之乃一秤銀銅法  
馬子也權之重十兩背有鑄成字樣爲萬歷二十二年

置七字鄰里傳玩之此物入胎其理殊不可解又載徐州吳氏產子五十四日小兒忽嘔出三角物洗之得大錢七十二文輪郭周正皆有年號更奇

### 楚姑

楚姑義帝女也帝爲項羽所弑姑年十四遂自殺楚人立祠以祀在盱眙縣署後山相傳卽姑葬處見縣志

### 怙惡

王處仲誤食廁棗是小世面王介甫誤食釣餌是大姦回其怙惡之心卽小可見

張胡子

頻羅庵集雜言云滂池之魚得寸水而不死江湖之魚  
逃不過張胡子有以張胡子問者余無以應或曰網也  
詢無出處則亦臆揣之詞偶閱太平廣記言張胡子者  
漁人一日于江頭網得大魚腹有朱書云九登龍門山  
三飲太湖水畢竟不成龍命盡張胡子始知其來歷又  
小說載楊壽子者漁人宋淳熙中於南城縣章山支港  
網一大魚重百斤額有紅字云三度入潮門四度當大  
水下稍卻逢楊壽子與此事絕相類

侵宅詩

宋楊尚書玠致仕歸舊宅爲鄰里侵佔子弟以狀白公  
公批紙尾云四鄰侵我我從伊畢竟須思未有時試上  
含光殿基望秋風衰草正離離子弟不敢復言又楊尚  
書翥住宅旁地爲人所占一二尺或以告公公作詩云  
餘地無多莫較量一條分作兩家牆普天之下皆王土  
再過些兒也不妨其人愧服二楊之度相似可以風矣

潮州樂府

粵俗以潮州爲最壞黃霽青太守作樂府十首一曰翻

金罐戒遷葬也

潮俗溺於風水妄思趨吉避凶既葬其親復出諸土水之火之兵之瘞骨以罈

名曰金罐易其處曰翻甚有翻金罐何其愚風水不知

有與無爾祖爾父生何辜死後竈壤不得安其居百鎰

延堪輿千金買山地坏土猶未乾掉頭旋復棄發邱斷

棺析骸骨何異狐埋更狐捐子孫忍爲盜賊行富貴焉

能界凶悖美哉金罐藏諸幽夜來鬼哭聲啾啾牛眠吉

壤如可求又有覬覦人巧偷

潮民往往有以吉地盜換埋骨者

二曰螟

蛉子斥亂宗也

潮俗人家以丁多爲強乞養他人子非獨單門然也其有貌爲鞠育包藏禍心

者更多故矣異姓亂宗顯有功令是宜斥也

螟蛉子多奚爲曰以保族撐門

檐老無兒嗣厥後。吁可怪九子母。傷人抵罪李代桃。平時  
時養同豕牢。給貲行商涉洪濤。割蜜飼蠟酬其勞。性命  
命謬相託。恩義良已薄。一朝反唇乃交惡。此孽由來君

自作。

凡訟養子不肖者稱螟孽。

三曰女兒布傷乖離也。

潮俗嫁女以葛布辦裝稱

家多寡其極精細者名女兒布所以遺藁砧者昏姻道衰夫婦相棄布乎布乎非以結綢繆者乎是可傷也

女兒布產棉陽采葛澡絲凝雪霜。細如鮫綃薄蟬翼。非

烟非霧含風涼。富家嫁女多越好。貧家嫁女一匹少。爲

郎製衣穩稱身。服之無斃期。偕老可憐一朝恩義疎。夫

棄婦兮婦背夫。猶是箱中一匹布。誰道新人不如故。四

曰打怨家懲械鬪也

潮俗强悍負氣輕生小不相能動輒鬪殺名曰打怨家非條教所禁

口舌所論勢已積重官則權輕威克允濟區區補救奚爲乎是宜何如懲也

打怨家有何怨

有怨何不訴官衙昨昨輒爾兵相加壯丁在前老弱後

藤牌鳥鎗卒然湊今日鬪明日鬪彼洞胸此絕脰一閨

紛紛如怒獸殺人者誰莫窮究官來彈壓空寨逃祠堂

屋宇點火燒出此下策真無聊亦有調停兩和懌反覆

無常旋構隙小懲大戒終何益嗚乎安得十萬糗梁三

千兵制事許以便宜行三月以往可使蠻村懾伏民無

爭五曰買輸服哀彼誣也

潮俗非命死者其家每置凶徒于不問輒指告懦而富者



爲索錢計欲壑既滿大讐亦忘否則剔剔不已出錢者  
命爲買輸服弱肉強食傾家有之爲問司讞而保富者  
誰歟是買輸服鬼頭銀錙銖積累多艱辛乃甘跪獻控  
可哀也訴鬪殺之家人殺人是甲不是乙甲乃窮子乙富室擇  
肥而噬奇貨居一棺肯蓋千金軀慳囊破出無奈強者  
歡娛弱者賀岸上餓虎飽水中饑鯨饒可憐有冤屈曲  
不自直口中石闕碑長銜六曰宰白鴨憫頂兇也潮俗殺人  
眞犯輒匿不出而彼誣者又惟怯不自申埋率買無業  
愚氓送官頂替貪利者罹法網焉名曰宰白鴨是可憫  
也宰白鴨鴨羽何雛雛出生入死鴨不知鴨不知竟爾  
宰累累死囚又何辜甘伏籠中延頸待殺人者死無所

冤有口不肯波瀾翻爰書已定如鐵堅由來只爲香燈

錢

頂兒類多孤子所得身價彼謂之香燈錢以死後旁人爲之接嗣繼續香火也

官避處分圖

結案明知非辜莫區判街頭血流三尺刀哀哉性命輕

於毛勸君贖尾慎畫押就中亦有能言鴨七日速弔放

惡擄贖也

潮俗不逞之徒每結黨擄人關禁索賄甚有凌虐至死者被害訴牒必籲曰速弔放以人

爲貨甚于盜賊是可惡也而能惡之者誰也

速弔放情詞哀叩頭向縣官火

急鄉閒來老爹如不來阿總亦可使

潮俗稱官爲老速

弔則生遲則死贖還者多弔放者少忍氣復吞聲羣兇

婪肚飽窮魚脫網鷺鳥嬉不加誅殛官何爲試看被擄

人鳩形鵠面生理摧虎狼之穴木鵝積成堆擄人者每以堅木鑿

兩穴鉗其足

名曰木鵝八曰阿官患諷游冶也

潮俗富家子弟習於浮薄好弄鬪靡

爭妍取憐恬不爲怪土人目之爲阿官患俗以物阿官之小者曰患阿官者少不更事之謂是可諷也

患荒於嬉趙先生難爲師搔頭弄姿兀自喜柳巷穿來

又花市千金結交游俠兒六篷密昵嬋娟子香囊紫袴

褶紅金環飾耳搖玲瓏危哉呼孃復呼妹潮俗小名率以某孃某妹

柑呼若忘其爲男也或色寡人防抱背九曰打花會做賭博也潮俗

賭風莫盛於花會厲禁雖嚴旋革旋復蓋誘以厚利趨之者多往往敗家喪身曾莫之悔是宜儆也打花

會花門三十六三日又翻覆空花待從何處捉一錢之

利十倍三。奸巧設餌愚夫貪。一人偶得衆人慕。坑盡長

平那復悟。夜乞夢朝求神。神肯佑汝夢若告汝。不知廠

中饑死多少人。初一起三十止。送汝棺材一張紙。打花會者

寫批投廠竝按日存記廠中所開名目故十曰鶯粟瘴

諺有紙棺材之語。謂好之者必自斃也。向由西洋來本取鶯粟花脂熬膏而成近日內地亦有種以射利者流毒日廣有識者目

歎鴉片也。爲鶯粟瘴鶯粟瘴難醫治。黃茅青草衆避之。中此毒者

是可歎也。甘如飴牀頭熒熒一燈小。竹筩呼吸連昏曉。渴可代飲

饑可飽。塊土價值數萬錢。終歲但供一口烟。久之鰲黑

聳兩肩。眼垂淚鼻出涕。一息奄奄死相繼。嗚乎田中鶯

栗尚可拔。番舶來時。那得遇采風者。可以觀矣。

湖膠

太湖冰土人謂之湖膠。其中洪波之凝者如銀山如玉。柱名曰冰梗。湖凍之夜常有紅燈千百聚散冰上。洵奇景也。包山蔡薌城九齡有詩紀其事。

秦檜鑊

吾杭藩署之東偏有射堂三楹。庭坎古鐵鑊一。廣上銳下口。徑四尺深可二尺餘。向有蓋。今亡。傳是秦會之鑄以烹人者。烹人之說不見紀載。嗟乎下流歸天下之惡。

況檜之蛇蝎其心虎狼其性者哉不必爲之辯也

重建始興文廟碑記

先君向不喜作詩古文詞凡有乞爲者輒命王代構惟始興文廟碑記是手定之藁無集可歸敬爲錄而存之其文云原夫文運出于天文才產于地文學成于人朝廷崇儒重道胥郡縣而立之學而誕敷之教有盛有衰豈鍾毓之偶偏歟抑師儒之不講歟將所以妥神靈而肅廟貌者相度失其宜歟未可知也始興縣學宋嘉定朝創建於白石岡一時人文蔚起譚煥劉藻諸公後

先炳美迨元天歷中一遷郭頭再遷縣西前明嘉靖己丑知縣鍾世彥遷于東門街萬歷中知縣蔣時諧復遷于縣西萬歷辛亥知縣楊大順精堪輿學仍遷白石岡宋舊學地立癸山丁向自是而後迨我

國朝登科甲者十有七人至乾隆辛丑知縣衛克埴誤聽形家者言拆毀舊學更立子山午向迄今四十餘年科第之衰巨家之落仕宦之寂寥邑之人惻焉傷之今天子御極之七年桂林陽君耀祖來宰于斯邑人呈請改建因捐廉創修延南海孝廉梁君大選格定之卜地

之吉無過舊基惟嫌山向有礙且奎樓之建與龍氣乖  
方難以鍾靈毓秀於是轉改舊向經始之日浚土尺餘  
果得舊殿礎基前後一揆不差累黍噫異矣越一年余  
承乏是邑朔望瞻拜見夫殿桷廡礎以次鼎新傑閣崇  
祠竝皆革故溯丁亥季冬至今凡二十三閱月而大工  
以竣卜之天時揆之地理靡不宜矣自今以往有志之  
士亦修其在人者可耳廟成屬記於余余不能經營其  
始而乃得聿觀厥成何其幸歟爰次顛末而書之以誌  
前邑侯惓惓愛士之誠以彰鄉人士殷殷崇學之篤行



以卜我

國家駸駸得人之盛也時道光九年歲在己丑仲冬之月知始興縣事錢唐梁祖恩謹記時秉鐸茲土者教諭興寧陳德香訓導香山趙允菁也例得備書

家教

寄魚封鮓千古豔稱剝球之弟玃令蕭田寄球一夏布球卽日封還貽書戒之曰守清白以光前人他非所望於弟者又新城耿華平庭柏之母徐氏寄子詩云家內平安報汝知田園歲入有餘資絲毫不用南中物好做

清官荅聖時家教之正古人不得專美于前矣

### 古瓢

仁和明經趙寬夫先生坦好聚古瓢於斷垣敗甃閒極

意搜討前後共得凡六十有一爲孫吳紀元者二爲兩  
晉紀元者二十一始吳主亮太平元年迄晉孝武帝太  
元四年爲吉利語者四曰吉利叶宜曰萬歲不敗曰昇  
吉日造曰六月黃吉爲題識姓氏者六曰褚謁者曰陳  
叔惟曰賀信曰章氏所作曰章先作記曰噲壁爲古錢  
文者二十一率多六朝厭勝之品爲方勝者二爲人形

者四爲雙魚者一其字有篆有隸悉方整古勁畫亦奇  
愕有致先生珍此因自號曰保璧居士云

友漁齋詩

嘉善黃退庵先生

凱鈞

霽青太守尊人也著友漁齋詩

詩以清潔爲主七律最長花朝自營生壙云鶴歸華表  
知何日牛上荒邱會有時秋郊云未霜高柳尚多態將  
雨行雲慣逆風除夕云老僕關門先酩酊羣兒入座便  
團欒秋熱靜坐云風高卻得雙桐引池小難教一柳增  
新秋卽事云煮將鞭筍饒風味采得絲莚帶雨香中秋

對月寄安濤京師云始信人間有離別不知天上可高  
寒冬齋云瘦竹偎花相嬾嬾癡雲釀雪費商量仲夏小  
山園遣興云深林聽鳥有新語僻徑敲門惟故知和劒  
南夏日閒居韻云荷承疎滴圓融走梅長新梢自在橫  
小山園看菊卽事云風吹客鬢何妨短霜逼花頭未肯  
低初夏園居云服盆蘭舊香猶烈出水荷新葉尚尖消  
寒雜詠云梅蕊藏春圓似豆霜華殺草利於鎌烟雨樓  
偶題云水欺沙草全平岸柳殢春陰欲化烟枕上喜晴  
云雲可歸山無變態鳥先得氣有歡聲

漁洋山人詩

阮亭先生詩風流絕代而隨園之論之也多微詞蓋一則文深于情一則才餘于學故不能十分沆瀣其寔靜躁之致迥不侔矣至趙宮贊談龍錄刻意雌黃阮翁則又因私怨無當公評惟朱貪多王愛好六字恐二公亦無以辨也

同人集姓氏

如皋冒辟疆同人集自勝朝至

國初名士斯爲極盛先君宰開平松柏司巡檢冒芬是

其裔孫特假而手鈔姓氏一帙始董其昌終蔡啓傅共四百五十有六人

### 無題詩

無題詩與香奩詩界若鴻溝李義山之詩無題詩也韓冬郎之詩香奩詩也蓋無題之什不必盡寫情懷而香奩之篇則竟專作膩語至閒情風懷則指實事矣客有以無題詩示余者余曰此香奩體也因作無題十六首和之其詞云十二屏山夢不通自將閒恨訴東風。亮無海鳥能銜石。但有杯蛇慣誤弓。密意迷離猜豈蔻。孤心

容易怨梧桐。金鑲信息全無準。腸斷零烟。賸雨中一種。  
纏綿百番癡。怕提前事惹相思。風懷俊似江珧柱。情味  
甘于蜀荔支。湘竹多愁。偏忍淚。海棠無語。但垂絲。落花  
總被封姨妒。不許金鈴好護持。徐拍紅牙。唱綠腰來時。  
玉笛去時簫。從教北里迎中婦。肯令東風鎖小喬。楊柳  
簾櫳無賴月。枇杷門巷可憐宵。何當選夢疎窗下。甲煎  
名香細細燒。不愁地遠。恨情魔眼底。紅牆卽絳河東宿。  
是張西宿角。南山有鳥北山羅。蕊宮環珮依稀聽。桂府  
樓臺曲折多。手把芙蓉憶芳澤。不知何處託微波。疑雲

認雨了無痕多少。廬詞託夢魂。黃絹心思猜石碣。紅綃  
手語報崑崙。早看玉兔開奩鏡。只恐仙厖吠洞門。爲告  
重來劉阮道。桃花零落易黃昏。飛燕何能遇伯勞。空懷  
瓊珮泣江皋。誰歌子夜新團扇。可有并州快翦刀。舊字  
烏絲藏未滅。新名碧玉記能牢。青溪白石通門路。認取  
他時泛小舸。秋風吹送玉河槎。重疊紅樓認欲差。願作  
蟾蜍吞北斗。化爲蝴蝶夢南華。九疑山曲渾無路。三折  
江橫半是沙。空對遙天憶芳草。灘前閒殺白蘋花。莫把  
無郎問小姑。陌桑曾爲唱羅敷。死生自是頭相責。烏鵲



空憐尾畢逋。已冷情腸寒水玉。未灰心字博山鑪。蠻箋  
百幅都題徧。脈脈愁懷訴得無。天香飄處月娟娟。證到  
拈花未了禪。洛女神光離後合。嫦娥心事缺中圓。生香  
蕙葉因蘭誤。出水荷根被藕纏。安得重磨雙慧劍。斬除  
舊業與新緣。十分將息愛花心。春在冥濛底。許尋出谷  
鳥。新聲瑣碎聽冰狐。小意沈吟將詞又默。三眠起。欲語  
還羞。七縱擒。便使微風吹皺水。已看情比綠波深。半泓  
清淺。卽蓬瀛玉佩。明璫未可憑。縱許畫簾飛紫燕。那堪  
叢棘惹青蠅。六萌車走雷千道。三里花迷霧一層。隔水

盈盈誰駕鵲黃姑欲渡竟無能。話到憐儂倍可憐。定情  
詩作斷腸篇。一丸冷月狐能拜。十面罡風鳥不前。草草  
短緣駒易過。漫漫長恨鵲難填。空餘一掬靈均淚。洒向  
西風黃葉天。已向菩提證懺除。可堪綺障又縈紆。三千  
芥子藏愁孔。百八牟尼記恨珠。絮早沾泥難捉摸。花因  
墮溷太黏濡。此身總被牢籠誤。慚對簷前結網蛛。巫雲  
只在第三峰。從此蓬山一萬重。細雨階前開芍藥。輕雷  
塘外見芙蓉。惱公裁句詩情幻。歸妹占爻易兆凶。好倩  
秋鴻傳信息。青箋紅淚一齊封。迢迢兩地已參商。況有

中間鳩鳥翔蓮子倒垂愁愈結柳枝橫種恨難償龍飛  
出骨難成藥麝死畱臍總抱香一曲琵琶三弄笛尊前  
爭不斷人腸回首桃源路已差空將餘恨譜紅牙多情  
惜別憐芳草有淚無名哭落花半闕新詞金縷曲一條  
心路玉鉤斜幽懷欲寫終難寫惆悵江天日暮霞

### 寫榜吏

錢文端公乾隆庚午典試江西寫榜吏陳巨儒年七十  
矣自言手寫文武三十二榜求公書以爲榮公贈詩云  
桂籍憑伊腕力傳白頭從事地行仙自言作吏中書省

曾侍朱衣四十年。至十月復寫武榜解首唱名。則其孫  
騰蛟也。掀髯一笑。筆墮于地。中丞大喜。索方伯彭公  
屏作詩。時蔣荅生先生在幕府。代作一絕云。榜頭題處  
笑開眉。七十年來鬢若絲。官燭兩行人第一。夜闌回憶  
抱孫時。眞佳話也。

字無對

天下之字皆有對。如大小長短厚薄深淺之類。惟渴字  
無對。見宋稗類鈔。

周槐

華山槐相傳爲周時樹附柏而生俗呼商柏抱周槐一

夕雷擊其半華竹樓舅氏

文桓

自華陰歸攜其一片贈

邵東籬姨丈

廣鑑

因徧徵同人詠之此可與龍雨樵太

史南山松皮竝傳南山松皮者北口外物也太史謫戍  
攜歸者

碩人

左傳莊姜美而無子衛人所謂賦碩人也沈彤果堂集  
云美之說詳于次章至無子之云以傳義考之未有所  
見竊嘗反覆末章而得其說焉夫所謂庶姜孽孽者謂

娣姪之生子如木芽之旁出孽孽然也庶士有竭者謂衆子中有竭然健以武者也言衆妾多士而莊姜之無子自見其說甚新

### 逸書

洪容齋二筆云說文於迷字下引虞書旁迷倬功又曰怨匹曰仇然則出于虞書今亡矣案旁迷方鳩或古人通用今其語明明在也至下句則竟逸書矣然亦見于左氏桓二年傳惟匹耦字異耳

### 宋主荒淫

宣和遺事載徽宗幸李師師家師師妓名也又理宗于  
元夕召妓唐安安入禁中見東城雜記孫祖荒淫後先  
一轍欲不亡得乎

### 通

服虔曰旁淫曰通然牆有茨庶頑通于君母左傳孔悝  
之母與其豎渾良夫通是上淫亦可曰通也齊莊公通  
于崔杼之妻蔡景公爲太子般娶于楚通焉是下淫亦  
可曰通也愚按晉祁勝與鄔臧通室此通字用得最切

### 詩品

司空圖詩品何等超妙隨園老人仿而作續詩品然只是論非品也郭頻伽先生作詞品其微至處獨可步塵表聖許玉年明府又有畫品

雷異

嘉慶壬申廣東新寧某村兄弟二人有妹已適人兄四十未娶弟曰兄不娶將絕嗣盍鬻弟以娶婦兄曰得婦而失弟不可以爲人如其無婦也村富戶聞而義之語其兄曰吾正需傭今予若三十金若弟爲我傭而當其息弟得食若得婦不兩利乎他日有金可贖也從之



婦歸竊疑夫故有弟今何在也夫泣語以故婦曰得婦而失弟不可以爲人不如其無婦也歸謀諸父展轉得三十金藏諸笥旣而索之亡矣憤而自縊葬日小姑哭送之忽雷震棺開婦活而小姑死金擲于地蓋小姑歸寧知嫂藏金處陰竊之而婦不疑也遂以棺葬小姑而以金贖其弟事見鶴山吳鴻來孝廉

應達

雁山文集

高懷

方正學偕葉夷仲輩夜登巾山絕頂飲酒望月劇談千古因曰昔蘇子瞻與王定國諸公登桓山吹笛飲酒踏

月而歸以爲太白死後三百年無此樂矣斯又子瞻死後三百年無此樂也余嘗游金山見洪稗存太史題壁詩句云玉帶風流五百年今朝重醉此山巔再從以上追前輩采石磯頭李謫仙其高懷正復相似

講易

易同人曰伏戎于莽升其高陵張邯解曰莽皇帝名升高陵謂高陵侯子翟義也見王莽傳如此解經可以噴飯

聖相師王

秦會之人尊爲聖相韓平原人尊之爲師王二名可作對

任忠勇神道碑

袁簡齋先生任忠勇公神道碑起四句云山西出將應運生祈父之才巴蜀從軍從古落大星之地一起已將生平揭盡是何等魄力

朱註作小講

曾見明人某省某科題爲子在川上曰一節解元文起講云今夫天地之化往者過來者續無一息之停乃道

體之本然也然其可指而易見者莫如川流故夫子于此發之全鈔朱註一字不移不知當時未行朱註耶抑主司忘之耶然以此註作講實屬超妙亦可謂文章本天成妙手偶得之矣

### 安南表

康熙中安南國進貢其表文云外邦之丸泥尺土不過中國飛埃異域之勺水蹄涔原屬

天家雨露語極恭順得體且措詞嫺潤中國亦無有能過之者莫謂偏隅無才也

麗人行

虞山孫子瀟太史有麗人行一篇不知何指余最愛誦之有酒易醉花下人有金難買花前春美人十五瓜未破夜夜微酣抱花臥春風學得柳妖嬈鄰家女兒羞舞腰長安貴人初賜第高築層臺貯小喬綠波一朵紅蓮起豔李穠桃盡休矣啼笑俱能博主憐徹夜歡聲朝不止天生尤物不福人用盡黃金貴人死貴人死美人逃胸前帶得金錯刀和烟和月築樓住開窗自弄秦時簫美人門前五陵騎裘馬翩翩稱人意使君有婦羅無夫

相逢何必還相避。君不見梁綠珠。花飛玉碎。何其愚。季  
倫得罪金谷改。胡不善保千金軀。又不見關盼盼。紅褪  
香消都夢幻。尚書劒舄已成塵。及早開簾召雙燕。貴人  
之富富不如石崇。貴人之官官不如建封。生前黃金鑄  
嬌女。死後他人樂歌舞。劉伶愛酒酒爲生。潘岳種花花  
對語。至今花不開。潘岳墓前春酒不澆。劉伶墳上土。

### 酒祀典

明袁石公

宏道

觴政入之祭云。飲必祭。始禮也。孔子惟

酒無量。不及亂。酒之聖也。祀爲飲宗。四配曰。阮嗣宗。陶

淵明王無功邵堯夫十哲曰鄭文淵徐景山嵇叔夜劉伯倫向子期阮仲容謝幼輿孟萬年周伯年阮宣子而山巨源胡母彥國畢茂張季鷹何次道李元忠賀知章李太白以下則祀兩廡至若儀狄杜康劉白墮焦革皆以醢法得名無關飲徒祀之門垣亦猶校宮之有土主梵宇之有伽藍也愚謂以宣尼爲飲宗終覺侮聖不若推靖節先生爲尊而諸子中再另選一人祀之較爲允協

人心不死

唐朱泚逼樊系草詔詔成明日仰藥死明永樂令樓璉  
草詔草歸逡巡自縊死忠義自在天壤人心不死也長  
安石工安民不肯鑄司馬君實名字九江石工仲寧不  
肯鑄東坡山谷名字公道自在天壤人心不死也宋周  
大理聞岳飛獄下而去職明林祭酒因陸監上書而挂  
冠名教自在天壤人心不死也司馬孚因弟昭弑君而  
痛哭朱全昱因弟溫謀逆而大罵名分自在天壤人心  
不死也

詩人工對



滑稽詼諧也亦吸酒曲器也見清異錄故蘇頌詩曰自知伯起難庸峭不及淳于善滑稽蓋庸峭訓挺拔而又爲承梁小木可見古人運典屬對之工宜荆公見銀海玉樓之對而歎絕也

### 黨姦之尤

李贄極稱武后馮道丁謂以曹操司馬懿爲聖人王安石力辨劇秦美新之爲谷永作而以楊雄爲大賢夏竦贊美李林甫相業漁洋山人稱邱某謂秦檜謀國遠勝岳忠武本朝李穆堂力爭嚴嵩不當入奸臣傳是皆黨

姦之尤者也

廁詩對

魏善伯徵士題范覲公中丞廁上對云文成自古稱三  
上作賦而今過十年典雅穩切之至

小人

小人之稱自古有之小人有母皆嘗小人之食矣穎考  
叔稱之于君願以小人之腹度君子之心閻沒女寬稱  
之于相後乃爲廝役下賤之稱矣宋錢世召錢氏私誌  
載宣和中有遼右金吾衛上將軍韓王歸朝授檢校少

保節度使對中人以上說話卽稱小人中人以下稱我家每日念天童經數十徧忽曰對天童豈可稱我自皇天生我以下悉改云皇天生小人皇地載小人日月照小人北斗輔小人前後二十餘句凡稱我者皆改爲小人亦未免太可笑也

蝦蟆給事

宋紹興中大旱禁屠宰諫議大夫趙霈上言曰自來屠宰但禁猪羊而不及鵝鴨請并禁止時因呼爲鵝鴨諫議明給事沈公亦因天旱上言禁捕蝦蟆湯若士目爲

蝦蟆給事人謂湯曰得不傷輕薄乎湯曰吾政欲爲此  
公垂不朽與鵝鴨諫議作切對耳上見閒燕常談下見  
萬歷野獲編

弟婦

弟之妻萬不可稱婦戴記大傳曰謂弟之妻婦者是嫂  
亦可謂之母乎駁得最痛快今杭人大呼弟婦且爲之  
諺曰長嫂爲孃顯背禮經可怪也

余

人在水上曰余人在水下曰次沈去聲此皆土人臆造之

字非有典要也有以余字問人者其人不知沈吟良久  
曰據字義或是水旁加一去字于理爲近座客皆稱善  
有頃忽問者歛容起謝曰怪底某前日于某寺中見一  
經題曰妙余蓮花經也于是諸人均大悟而撫掌

### 斲斲

以手量物輕重曰斲斲見莊子註或曰顛篤音義同也  
今各處口談尚有此語又以一心權事之是否亦用此  
二字

### 丁拐兒

衙門向呼官親曰火腿繩子以其高而無民兼有股削脂膏之意也今易其名曰丁拐兒叩義所在曰丁拐依二四則其分爲至且居二四之左大無外也若離二四則么四二三得而乘之矣刻酷之至

笑柄有本

朱二泉孝廉

瀚

仁和人性蘊藉而善諧謔一夕京邸小

飲座皆杭人以笑話爲令二泉有樹竿曝衣而插于木礫者衣重風緊屢屢吹倒一人曰須用石礫方可不動一人曰石不動乎何以染坊元寶石吾見其自朝動至

夕也曰彼自有人腳踏故耳曰城隍山紫陽山每日千萬人腳踏何又不見其動也曰彼乃大而實心故難動耳曰然則城河橋梁皆小而空心者何亦日踏而不見其動也按此俳語亦有所本東坡先生艾子雜說曰營邱士造艾子問曰凡大車之下及橐駝之項多綴鈴鐸其故何也艾子曰車駝物大且多夜行狹路相逢難于迴避以聲相聞使得預避耳營邱士曰佛塔之下亦懸鈴鐸豈塔亦夜行而使相避耶艾子曰君不通乃至如此凡鳥鵲多託高以巢糞穢狼藉故塔鈴所以警鳥鵲

也營邱士曰鷹鵠之尾亦設小鈴安有鳥鵲巢其尾乎  
艾子大笑曰怪哉子之不通也夫鷹隼擊物或入林中  
而絆足緇綫偶爲木之所綰則振羽之際鈴聲可尋而  
索也營邱士曰吾嘗見挽郎秉鐸而歌雖不究其理今  
乃知恐爲木枝所綰而便于尋索也但不知挽郎之足  
者用皮乎用綫乎艾子愠而荅曰挽郎乃死者之導也  
爲死人生前好詰難故鼓鐸以樂其尸耳與此戲語政  
相類

## 代寫書



代巾幘寫家書虐政也余幼時曾爲一親串寫寄夫書

口授云孩兒們俱利腮

猶言解事也

新買小丫頭倒是箇活

腳蟾兒作事且是溜

猶言快

惟僱工某人係原來頭

初次

也

週身僵爬兒風

左右不是也

余曰可改竄乎曰依我寫于

是只好連篇別字信手塗抹近閱呂居仁軒渠載二則

極相似錄之以併作一笑陳氏寓嚴州諸子宦遊未歸

有族姪大琮過之嬾令作寄子書因口授云孩兒要劣

嬾子又閱閱霍霍地且買一柄小剪子來要剪腳上骨

出

上聲

兒肱

音肱

支

音支

兒也大琮不能下筆又京師有營婦

其夫出戍以數十錢請一教學秀才寫書寄夫云窟賴  
兒娘傳語窟賴兒爺窟賴兒自爺去後直是忔音忔憎每  
日恨人聲特特地笑勃騰騰地跳天色汪去囊不要喫温  
吞蠖脫底物事秀才沈思久之以錢還云你且別倩人  
寫去蓋二子不肯寫者生恐落筆別字不若余之無耻  
也

### 治眼齒

宋張文潛曰目有病當存之齒有病當勞之治目當如  
治民治齒當如治軍治民當如曹參之治齊治軍當如

商鞅之治秦

奚鐵生

奚鐵生徵君

岡

號蒙泉外史杭之仁和人也工畫山水

花卉兼善大隸精篆刻詩才清絕俱爲畫所掩與山舟  
學士善里中凡有求學士書扇者則一面必徵君畫也  
於余家爲羣紀交先伯叔祖先大父並相結契昕夕過  
從先生性嗜酒而尤喜劇談半酣以往或多所白眼者  
故人恒忌之晚年遭回祿境三子先公歿遂無嗣以兄  
子伯玉茂才潤爲嗣歿後十餘年其友顧西樸先生洛

爲之追摹遺像極其神似裝冊徵詩余附七古一篇伯  
玉曰是詩可以爲先子小傳遂錄而存之蒙泉先生老  
故鄉在昔爲我大父行大父之歿歲癸丑又十載後公  
云亡其時壬也尚童穉未獲杖屨親輝光公之風流及  
文采我父詔我言之詳先生之貌清且雅寒如秋水和  
春陽先生之品峻且潔皎如孤鶴雲中翔先生之詩妙  
天趣冬心樊榭有瓣香先生之畫擅衆美衣鉢徐立華  
秋兼陳几方山先生鐵筆恣奇古後先丁叟林伯仲黃  
松先生大隸脫凡近上法漢魏兼宗唐先生酒懷更磊

落一飲往往傾百觴。泉明歌嘯伯倫哭。嗣宗瀟灑元龍  
狂。從來名宿主多壽。矧有閒福供徜徉。何期反遭造物  
妒。竭來變局成滄桑。某年吾郡染喉疾。城闐市舍俱罹  
殃。先生三子並蔚起。鳳毛麟角森光芒。一時玉樹共摧  
折。西河老淚空盈眶。繼以嬌女亦蘭蕤。遺書莫授悲中  
郎。逾年又被祝融虐。燼化籤軸兼縹緗。移家方遂卜居  
願。又悲老母終萱堂。嗚乎人生匪金石。那禁連慟摧肝  
腸。一朝淚盡骨髓竭。公亦相繼歸北邙。其才何豐遇何  
嗇。此意吾亦疑穹蒼。公歿距今廿餘載。墓門草宿松杉

長虎頭居士公老友追思遺像摹形相公之嗣子竹林  
彥謹守此冊池新裝攜冊示我索我咏展視佳什紛琳  
琅羸庵諫庵伯祖旋園接山叔祖兩老人其上各有畱題章六七  
年來並殂謝對此那不心爽傷請識所聞具如右作歌  
繼事書其旁歌成我尚有餘感祖庭追憶空徬徨伯玉  
年逾四十猶困一衿現就幕廣東

些

楚詞些字沈存中以爲梵語薩婆訶三合之音夫其時  
佛教未入中國豈梵音先及荆楚耶且母也天只不諒

人只鄘風也椒聊且遠條且唐風也俟我于著乎而充耳以素乎而旣曰歸止曷又懷止齊風也各各不同又將何解蓋列國並有方音此是其卒語之詞耳

### 路化王

許亭史孝廉

心坦

仁和人官慶元學博性嗜飲而好談

諧一日座中忽舉問曰戲劇中八大王余嘗考之已得其人昨閱五虎平西小說有所謂路化王者稱李國舅云是李太后之弟自民間訪來者其人有可考否一客曰先生亦太好古矣此不過因狄太后有姪封王故設

言此人以作陪襯耳何足深究耶余并五虎平西小說亦未之見更不敢置喙後閱宋魏泰東軒筆錄首一條卽記云李太后始入掖庭纔十餘歲惟一弟七齡太后臨別手結刻絲鞞囊與之拊背泣曰汝雖淪落顛沛不可失此囊異時我若遭遇必訪汝以此爲物色也後其弟傭于鑿紙錢家然常以囊懸胸臆未嘗斯須去身也一日苦下痢勢將不救爲紙家棄于道左有入內院子者見而收養之怪其衣服百結而胸帶鞞囊問之具以告院子惄然驚異蓋嘗奉太后旨令物色訪其弟也遂



解其囊入示太后具道本末是時太后封宸妃眞宗已生仁宗矣聞之悲喜遂以其事白眞宗遂官之爲右班殿直郎卽李用和也及仁宗立召用和擢以顯官後至殿前都指揮使領節鉞贈隴西郡王世所謂李國舅者是也據此則其人並非杜撰

物性之異

石入水則沈而泗濱有浮水之磬材木入水則浮而南海有沈水之烏木水類出水卽死風類入水卽死而鰲鳧蟹則出入于水而皆不死牛順風而行速馬逆風

而行速皆物性之異也

陽明

陽明之學譽之者半毀之者亦半甚有醜詆之比于王安石者此則太過然愚謂公亦有自取之處公嘗詆朱子以爲禍不下於洪水猛獸今天下皆紫陽之徒也無怪千夫之集指矣

問家鄉詩

陶淵明問來使詩云爾從山中來早晚發天目我屋南山下今生幾叢菊王摩詰詩云客從故鄉來應知故鄉

事來日小窗前。寒梅著花未。王荆公詩云道人北山來。  
問松我東岡。舉手指屋脊。云今如許長。三詩機軸相同。  
而各有意致。

### 糖霜

糖霜之名唐以前無所見。古人只有飴。乃煎米蘖而成。  
者見三禮註。宋玉招魂。飴飴驚羔。有蔗漿些。是以漿代  
糖用也。後漢書顯宗紀。以糖作狻猊。曰糖猊。此熬糖爲  
膏耳。吳志孫皓使中藏吏取交州所獻甘蔗。飴則稍鍊  
矣。至唐太宗遣使至摩竭陀國。取熬糖法。詔揚州取蔗

作瀋如其劑色味愈西域遠甚然只是今沙糖櫛之技  
惟坡公過金山寺作詩送遂寧僧圖寶云涪江與中泠  
共此一味水冰盤薦琥珀何似糖霜美又山谷在戎州  
作頌荅梓州雍熙長老寄糖霜詩云遠寄糖霜知有味  
勝于崔子水晶鹽正宗埽地從誰說我舌猶能及鼻尖  
糖霜之見于文字者惟此二詩然蘇所咏者尚紅糖霜  
而黃所賦者始是白糖霜也宋遂寧王灼有糖霜譜大  
歷中有鄒和尚者來小溪之繖山結茅以居跨白驢須  
鹽米薪菜之屬卽書寸紙系錢驢背負之市人知爲鄒

也取平直挂物于鞍縱驢歸一日驢犯山下黃氏蔗苗  
黃訴于鄒鄒曰汝未知以蔗糖爲霜利可十倍吾語汝  
以塞責可乎試之果然自是流傳其法鄒末年走通泉  
縣靈鷲山龕中其徒追及之但見一文殊石像始知菩  
薩化身而白驢乃獅子也

詩書序次

變風終以周公變雅終以召公周開王化之始召贊王  
化之成思之深故望之切也毛詩終商頌尚書終秦誓  
商以啟周之先秦以繼周之後其旨微故其文顯也

## 武后

則天朝張薛承辟陽之寵右補闕朱敬則上書切諫中有陛下內寵已有薛懷義張易之昌宗固應足矣近聞尚食奉御柳模自言子良賓潔白美鬚眉左監門衛長史侯祥自云陽道壯偉過于薛懷義專欲自進堪充宸內供奉無禮無義溢于朝聽云云則天勞之曰非卿直言朕不知此賜綵百段其言雖出忠悃然穢語竟入奏章可乎

## 讀書

宋裴惲詩有太康字宣宗曰太康失邦何以此謂我宰  
執奏晉平帝改元太康曰天子須博覽不然幾錯罪惲  
由是耽味經史中夜不休宮中目上爲老博士見宋令  
狐澄大中遺事太祖嘗謂趙普曰卿苦不讀書今文臣  
角立雋軌高駕卿得毋愧乎普由是手不釋卷見宋釋  
文瑩玉壺清話見古君臣交相責難真如師友切磋又  
涑水記聞太祖嘗謂秦王侍講曰帝王之子當務讀經  
書知治亂之大體不必學作文章無益也至哉斯言隋  
帝李主是爲殷鑒若唐文皇之聖學淵深宏文肅括則

天縱之姿又當別論也